

**BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
VLADA KANTONA SARAJEVO**



**PRINCIPI I MJERE DJELOVANJA
VLADE KANTONA SARAJEVO
2023 - 2026.**

EKSPOZE PREMIJERA

Sarajevo, 24.3.2023.godine

Nihad Uk



SADRŽAJ

1. UVOD	3
2. MJERE DJELOVANJA PO RESORIMA	5
2.1. Ministarstvo pravde i uprave	5
2.2. Ministarstvo zdravstva	5
2.3. Ministarstvo komunalne privrede, infrastrukture, prostornog uređenja, građenja i zaštite okoliša	6
2.4. Ministarstvo saobraćaja	7
2.5. Ministarstvo za rad, socijalnu politiku, raseljena lica i izbjeglice	7
2.6. Ministarstvo unutrašnjih poslova	8
2.7. Ministarstvo privrede	8
2.8. Ministarstvo za odgoj i obrazovanje	9
2.9. Ministarstvo kulture i sporta	10
2.10. Ministarstvo za nauku, visoko obrazovanje i mlade	11
2.11. Ministarstvo finansija	11
2.12. Ministarstvo za boračka pitanja	12
3. ZAKLJUČAK	13

DODATAK:

PROGRAM SKUPŠTINSKE VEĆINE U KANTONU SARAJEVO



1. UVOD

Poštovani predsjedavajući, zamjenici predsjedavajućeg Skupštine Kantona Sarajevo, uvažene zastupnice i zastupnici, uvaženi predstavnici medija, drage gledateljke i gledatelji Televizije Kantona Sarajevo, dame i gospodo

Prvi put sam stao za ovu govornicu prije nešto više od deset godina, kao vijećnik u Općinskom vijeću Centar a potom kao zastupnik u Skupštini Kantona Sarajevo i uvijek sam s poštovanjem govorio. Govorio sam sa željom da poštovanje i sam zaslužim, ne samo ja lično, nego i funkcija koju obnašam i institucija koju predstavljam. Kao mandatar za sastav nove Vlade i kao, nadam se, nakon vašeg glasanja, premijer, imam još veće poštovanje, kao što je veća i težina zadataka koji se pred mene postavljaju, te nivo odgovornosti koji mi je povjeren.

Mi političari ogledalo smo mnogo čega. Naš ugled trebao bi biti proporcionalan ugledu onoga što predstavljamo. Ne smijemo nikad zaboraviti da svi mi ovdje zajedno predstavljamo Sarajevo, grad simbol. Simbol stradanja, ali i otpora, otvorenosti, simbol sporta i umjetnosti, simbol dobrog humora i hrane, komšiluka i gostoprimstva. Pored toga što smo simbol, moramo biti i stvarnost svega ovoga na šta smo ponosni. Naš zajednički zadatak je da ovoj sali, a na taj način i našem Kantonu, vratimo dignitet koji je u proteklim godinama nerijetko izostajao. Mi ne dolazimo iz iste političke porodice, ali želim da vjerujem i radit ću na tome da nam zajednička misija bude da ovaj grad i ovaj kanton zaista budu centar Bosne i Hercegovine, centar svega što je dobro.

Na ovome baziram svoj lični i profesionalni put. Pozivam sve nas da zajedno budemo na visini zadatka koji nam je povjeren, u tome ću vam uvijek biti prijatelj i partner.

Dugo sam razmišljao o preuzimanju ove funkcije. Kao najmlađi mandatar za premijera Kantona Sarajevo osjećam dodatnu odgovornost pred građanima i građankama kantona, ali i prema mladima iz cijele Bosne i Hercegovini. Svojim predanim angažmanom želim ih potaknuti da učestvuju u procesima, preuzimaju odgovornost i kreiraju našu zajedničku budućnost.

Mi ovdje možemo biti najveći eksperti za sve probleme koji tište Kanton, ali malo toga ćemo uspjeti bez podrške građanki i građana. Pod podrškom pritom ne podrazumijevam slijepo slijedenje naših zahtjeva, odluka i rada, već konstruktivan odnos u kojem je kritika uvijek poželjna, osuda ako je zaslužena, a pohvala samo pod uslovom izvanrednosti u radu. Smatram da se podrazumijeva da svi mi moramo preuzeti odgovornost za posao koji nam je povjeren i ispunjavati obećanja koja smo dali, imajući na umu da smo ovdje zato što smo izabrani i imenovani od građana i građanki.

Da bismo naše sugrađane i sugrađanke ohrabрили da budu aktivni i konstruktivni sudionici našeg rada, potrebna je naša potpuna otvorenost koju ću kao premijer omogućiti.



Dostupnost građanima i građankama mora biti neupitna. Samo tako ljudi mogu doživljavati bilo koju vlast kao svoju i stvari od javnog interesa kao svoje lične. A upravo to, da se prema stvarima od javnog interesa odnosimo kao prema ličnim, ono je što nam je prijeko potrebno. Nažalost, Sarajevom se nije baš uvijek domaćinski upravljalo, jer da jeste imali bismo daleko manje problema s čistoćom grada, kvalitetom zraka i vode, javnim prevozom i brojim drugim izazovima. Sarajevo se mora vratiti na evropsku scenu metropola.

Nova Vlada neće kretati od početka. Imamo dobre temelje i koristim ovu priliku da se zahvalim prethodnoj vladi, kao i vama koji ostajete dio tima. S namjerom koristim riječ tim, jer je ovo zajednički posao.

Prethodna Vlada Kantona Sarajevo pokazala je da se politika može voditi drugačije. Transparentan i građaninu orijentisan pristup prepoznat je širom naše domovine a neka od uspješnih rješenja su prepisana i u drugim kantonima.

Govorio sam o tome da mi kao političari moramo voditi računa o tome šta predstavljamo i ponašati se u skladu s tim. Ova Skupština i Vlada moraju biti ogledalo Sarajeva koje će isticati njegovo dostojanstvo, ali isto tako naš Kanton mora biti ogledalo dostojanstva naše Bosne i Hercegovine. Sarajevo je glavni grad. S koje god pozicije djelovali, to moramo imati na umu i pomagati i naše sportiste i naše umjetnike i naše poljoprivrednike i naše povratnike i naše slabije razvijene sredine ma u kojem se dijelu Bosne i Hercegovine nalazili. Samo tako ćemo postići da budemo glavni grad i u srcima svih naših ljudi.

Sa zadovoljstvom najavljujem da će se naši sugrađani i sugrađanke voziti u novim tramvajima, da ćemo proširiti tramvajsku prugu do Hrasnice i trolejbusku liniju do Vogošće, sadržajno obogatiti naše olimpijske planine nastavkom započetog investicijskog ciklusa u sportsku i rekreativnu infrastrukturu, sagradit ćemo Univerzitetsku biblioteku, Muzej savremene umjetnosti Ars Aevi. Opredijeljeni ćemo biti da košarkaška i rukometna Bosna, te Željezničar i Sarajevo dobiju podršku kako bi se vratili na stare staze slave. Nastavljamo još snažnije ulagati u mlade, porodicu i nauku.

Mi Bosanci i Hercegovci smo navikli da je vrlo malo perioda u našoj historiji bilo bez brige i srkleta. Tako je i danas. Naša država, društvo, naš kanton nalazi se u izazovnom periodu uzrokovanom globalnom privrednom i energetsom krizom, odlaskom mladih i obrazovanih ljudi kao i očitij političkoj polarizaciji. Nada i vjera u bolje sutra postale su rijetkost. Vratimo ih zajedničkim radom.



2. MJERE DJELOVANJA PO RESORIMA

Poštovane zastupnice i zastupnici,

Dopustite mi stoga da iznesem smjernice rada Vlade, bazirane na Strategiji razvoja Kantona Sarajevo 2021 – 2027., kao i na Programu skupštinske većine Kantona Sarajevo 2023 – 2026. koju su sačinile stranke koje stoje iza ove vlade, a koji je dio ekspozea.

Ministarstvo pravde i uprave

Glavni fokus aktivnosti Ministarstva pravde i uprave u narednom mandatu bit će na digitalnoj transformaciji javnog sektora u Kantonu Sarajevo i izmjenama propisa potrebnim da se ova transformacija dogodi. Digitalizacija će podići kvalitetu usluge građankama i građanima Kantona, koji će do kraja ovog mandata svojim digitalnim potpisom preuzimati dokumente, aplicirati, tenderisati, plaćati usluge i obavljati druge slične radnje što je ustaljena praksa u cijeloj Evropi.

Nadalje, u cilju usaglašavanja pravnog okvira s Evropskom poveljom o lokalnoj samoupravi i implementacijama presuda Ustavnog suda Federacije Bosne i Hercegovine, Ministarstvo pravde i uprave će predložiti amandmane na Ustav Kantona Sarajevo, kao i tekst Zakona o lokalnoj samoupravi Kantona Sarajevo. Ministarstvo će u narednom mandatu biti i nosilac aktivnosti u vezi s mapiranjem koraka potrebnih za ustavno-pravnu reformu Kantona Sarajevo, a u skladu s dugoročnim ciljem transformacije Kantona u Sarajevo grad-kanton po uzoru na brojne evropske prijestolnice.

Ministarstvo će nastaviti aktivnosti iz prethodnog mandata koje se odnose na jačanje kapaciteta pravosudnih institucija i jačanje Ureda za borbu protiv korupcije i upravljanje kvalitetom Kantona Sarajevo, kroz trajno rješavanje statusa Ureda i njegovih nadležnosti koje bi bile utvrđene posebnim zakonom.

Ministarstvo zdravstva

Prvi korak u ovom mandatu će biti izrada Strategije razvoja zdravstva u Kantonu Sarajevo s jasno postavljenim, ali mogućim i održivim ciljevima i mjerama.

Pojačat ćemo sistem digitalizacije cijeloga sistema što je jedan od najvažnijih segmenata bolje i efikasnije iskorištenosti kadrovskih i materijalnih kapaciteta. Optimizirat ćemo odnos nemedicinskog i medicinskog kadra, koji je, prema svjetskim standardima, sada u ogromnom disbalansu na štetu medicinskog. Ministarstvo će se u ovom mandatu kadrovski pojačati i popuniti nedostajuća radna mjesta, što će omogućiti bolju organizaciju i efektivniji rad.

Obratit ćemo izrazitu pažnju na pojačanu promociju zdravlja i prevenciju bolesti. Opravdanost ulaganja u preventivne programe pokazala se prošle godine, kada je od 10.000 pregledanih u sklopu skrining pilot-projekta 500 osoba otkrilo maligne promjene na vrijeme.



Nastavit ćemo i s nabavkom najboljih ortopedskih pomagala za osobe s invaliditetom, jer je poboljšanje kvalitete njihovog života naš najvrjedniji cilj. Prioritet će nam biti prevencija i očuvanje zdravlja naših građanki i građana.

Ministarstvo komunalne privrede, infrastrukture, prostornog uređenja, građenja i zaštite okoliša

Nigdje se kvaliteta svakodnevnog života građanki i građana ne vidi kao kroz djelovanje u komunalnom sektoru. Gradska čistoća je prioritet. Ne samo da ćemo grad držati čistim tako što ćemo uložiti u naša kantonalna preduzeća, već ćemo i pozvati građane i građanke na saradnju kroz kontakti centar. Podizanje svijesti o čistoći pomoći ćemo i aktivnim radom komunalne policije.

U prethodnom mandatu izradili smo studiju opravdanosti analize različitih opcija za tretman otpada koja se povezuje s održivim upravljanjem otpadom i vrlo brzo ćemo morati donijeti odluku u kojem pravcu želimo ići. Ono u što sam siguran već danas jeste da je pitanje zbrinjavanja otpada, njegovo pametnije, ekonomski isplativije i ekološki opravdanije zbrinjavanje bazirano na konceptu cirkularne ekonomije, opredjeljenje kojim ću se voditi, nadam se uz vašu podršku.

Nastavit ćemo ulaganje u vodovodnu i odvodnu infrastrukturu i stavit ćemo naglasak na naše zelenilo. Pošumljavanje na obroncima grada, ali u samom gradu će postati svakodnevnica. Želimo da građanke i građani osjete naš trud i da zajedno držimo grad čistim kao da se radi o našim dvorištima. Čistoća je ogledalo grada, a Sarajevo zaslužuje samo najbolje.

Efikasnije upravljanje našim preduzećima postići ćemo osnivanjem Sarajevskog holdinga, digitalizacijom i objedinjavanjem strateških javnih nabavki za komunalni sektor.

Borba za okoliš je borba za evropsko Sarajevo. Aktivnosti na poboljšanju kvalitete zraka preklapaju se po različitim resorima, ali ih je važno spomenuti i u ovom kontekstu. Kontinuitet u razvoju javnog gradskog saobraćaja kao mjere kojom se potiče smanjenje broja privatnih automobila na ulicama, implementacija projekata iz Zelenog akcionog plana poput proširenja mreže biciklističkog saobraćaja i jačanje kapaciteta Centra za upravljanje kvalitetom zraka, neki su od koraka ka boljem zraku i zdravijem Sarajevu.

Nastavit ćemo štititi vjetrokoridore i obezbijediti transparentnije procese planiranja i gradnje.

U naredne četiri godine završit ćemo projekt utopljavanja javnih objekata i dalje raditi na proširenju mreže centralnog grijanja. Nastavljamo sa zamjenom malih kućnih ložišta i pokrenut ćemo projekt poticajne ugradnje solarnih panela u individualnoj stambenoj gradnji i u procesu izrade registra bespravne gradnje i mjera za sanaciju problema nastalih ignoriranjem ovog višedecenijskog problema koji je sasvim sigurno doprinio i lošoj kvaliteti zraka u gradu.



Nastavit ćemo poticajnu stanogradnju putem boračkog i kantonalnog stambenog fonda, ali i poticajima za rješavanje stambenog pitanja mladih porodica.

Ministarstvo saobraćaja

Javni prevoz je krvotok svakog modernog grada. Sarajevo zaslužuje nastavak intenzivnog investiranja u javni prevoz. Mogu obećati da ćemo se sljedeće godine voziti u novim tramvajima, jer je prethodna vlada već uplatila 15 novih tramvaja. Nedugo zatim, tramvaji će, nakon 35 godina, kad je prvi put ucrtana u planskoj dokumentaciji, voziti i prugom do Hrasnice. Vozit ćemo se u ovom mandatu i trolejbusom do Vogošće, a novi i bolji javni prevoz će imati moderni saobraćajni centar s adaptivnim upravljanjem raskrsnicama. Tako će za tramvaj uvijek biti zeleno svjetlo i sve veći broj građanki i građana će birati javni prevoz umjesto sopstvenog automobila. Usluge javnog prevoza će se plaćati elektronski, a planskom dokumentacijom ćemo otvoriti mogućnost za novi ciklus investiranja. Nema razloga da tramvaj ne dovedemo na Dobrinju i na Šip. Ulaganje u održivi električni transport je ne samo naša budućnost, nego će doprinijeti i čistijem zraku.

Nastavit ćemo saradnju sa Željeznicama Federacije BiH na poboljšanju usluga prevoza vozom od Tarčina do Ilijaša. Pomoći ćemo da se sagrade parkinzi i pristupne rampe kako bi veći broj građanki i građana odlazak u urbani dio Sarajeva obavljao javnim prevozom.

Izgradnja pješačke i biciklističke infrastrukture mora dobiti veću važnost. Gledamo kako evropski gradovi prolaze kroz transformacije, posebno u strogom centru, gdje je kretanje pješke ili biciklom daleko poželjnije nego automobilom. U vezi s ovim, naći ćemo način i da proširimo ponudu električnih bicikala a i da stimuliramo korištenje električnih automobila.

Resor saobraćaja će biti jedan od najvidljivijih i osjetim ushićenje najavljujući sve ove projekte.

Ministarstvo za rad, socijalnu politiku, raseljena lica i izbjeglice

Socijalna politika je ogledalo jednog društva, te shodno tome nastavit ćemo osnaživanje sistema socijalne zaštite kroz nove zakonodavne okvire uz podršku struke.

Prioriteti rada ovog Ministarstva bit će borba protiv siromaštva i socijalne isključenosti, te smanjenje nejednakosti u društvu. To, između ostalog, podrazumijeva jačanje kapaciteta centara za socijalni rad koji su okosnica socijalne zaštite, a u cilju pružanja što kvalitetnije usluge našim najranjivijim kategorijama.



Također, prioritet će biti i unapređenje međuresorne saradnje u zaštiti navedenih skupina, nastavljanje procesa transformacije ustanova socijalne zaštite i osiguranje razvoja i dostupnosti socijalnih usluga na razini lokalne zajednice. Također, nastaviti ćemo s osnaživanjem hraniteljstva kao najadekvatnijeg oblika alternativne zaštite za djecu bez roditeljskog i starijih bez porodičnog staranja, te povećanjem naknada korisnicima.

Kontinuirano ćemo raditi na programima započetim u ranijim mandatima, a detaljno pobrojanim u Programu skupštinske većine.

Nastavit ćemo reformu tržišta rada, posebno stavljajući akcent na ciljanu kvalifikaciju i prekvalifikaciju radne snage u skladu sa zahtjevima tržišta rada, boreći se protiv odlaska mladih iz našeg Kantona i države.

Ministarstvo unutrašnjih poslova

Mi kao administrativno sjedište i glavni grad Bosne i Hercegovine imamo dodatnu odgovornost da sigurnosni sektor funkcioniše besprijekorno. Strateško opredjeljenje Vlade Kantona Sarajevo bit će jačanje Ministarstva unutrašnjih poslova Kantona Sarajevo ljudskim resursima, modernizacijom stare i nabavkom nove opreme, te rješavanje infrastrukturnih projekata kako bi obavljanje poslova i radnih zadataka Uprave policije moglo biti podignuto na najveću moguću razinu.

Ministarstvo privrede

Ministarstvo privrede će intenzivno raditi na prilagođavanju zakonskih propisa potrebama savremenog tržišta i poslovanja. Pored toga, Ministarstvo će, osim ustaljene podrške lokalnim samoupravama u uređenju poslovnih zona, raditi i na uspostavi poslovne zone „Doglodi“, jedne od najvećih poslovnih zona na teritoriji Bosne i Hercegovine, koja će biti u nadležnosti Vlade Kantona Sarajevo. Ministarstvo će, također, raditi na izradi Zakona o preduzetničkoj infrastrukturi. Shodno Strategiji razvoja Kantona Sarajevo za period 2021 - 2027. Ministarstvo privrede će s ciljem razvoja strateških grana privrede raditi i na izradi Zakona o poticaju strateškim granama privrede, kao i daljnjem unapređenju poticajnih programa za razvoj poduzetništva.

Ministarstvo će donijeti novi Zakon o turizmu i Turističkoj zajednici Kantona Sarajevo i novu Strategiju razvoja turizma, te niz drugih dokumenata koji će jačati poziciju i razvoj turizma i Turističke zajednice Kantona.

Ministarstvo privrede prepoznaje i valorizuje značaj razvoja olimpijske infrastrukture i širenje sadržaja na Bjelašnici i Igmanu, pa će, stoga, u prvom redu raditi na realizaciji obnove višegodišnjih započetih projekata na ovim planinama, ali i kreiranju potpuno novih sadržaja kao što su nove skijaške staze, vertikalni transport, uključujući gondolu, pješačke i biciklističke staze, dječiji ljetni i zimski parkovi i drugo.



Ulaganjem u planinarsku infrastrukturu podignut ćemo nivo ponude u planinarstvu koji je u ekspanziji kod rekreativaca, a ujedno predstavlja veliki adut Kantona za razvijanje „outdoor“ turizma.

Globalne društvene promjene pokazale su važnost i značaj domaće proizvodnje hrane i nacionalne neovisnosti u oblasti proizvodnje energije, stoga je ovo Ministarstvo opredijeljeno kontinuirano ulagati u razvoj poljoprivredne proizvodnje, kao i razvijati efikasne instrumente za strateško upravljanje i korištenje prirodnih resursa i obnovljivih izvora energije što, prije svega, znači istraživanje prirodnih resursa na području Kantona i uspostavljanje registra koncesionih polja. Uz jasno detektovanje prirodnih bogatstava, na ovaj način se doprinosi i jačanju transparentnosti kod dodjela koncesija za korištenje prirodnih dobara. Ministarstvo je već započelo aktivnosti u cilju osnivanja prvog javnog pogona za proizvodnju peleta i javnog preduzeća za proizvodnju energije iz obnovljivih izvora energije, pa će ti projekti biti prioritet.

Kao bitan segment ukupnog privrednog ambijenta prepoznajemo i opće veterinarsko zdravlje i radimo na jačanju sigurnosti hrane, ali i građanki i građana na ulicama, pa su stoga predviđeni projekti humane depopulacije pasa i mačaka. Tu je neizostavno spomenuti i petogodišnji projekt osjemenjivanja u govedarstvu što je također u vrhu prioriteta ovog Ministarstva.

Na kraju, s ciljem da ovaj Kanton bude prepoznat kao mjesto ugodnog življenja i prosperitetnog poslovanja, Ministarstvo privrede će nastaviti ulagati u tehnološku modernizaciju, ekološku i digitalnu tranziciju malih i srednjih poslovnih subjekata. S ciljem pravovremene podrške privredi Ministarstvo je u prethodnom mandatu razvilo i osposobilo e-platformu s najsavremenijim softverom za dodjelu poticajnih sredstava, a cilj je da u 2023. godini platforma postane operativna i dostupna krajnjim korisnicima.

Ministarstvo za odgoj i obrazovanje

Odgoj i obrazovanje kao djelatnost od posebnog značaja za Kanton Sarajevo zadržat će i u naredne četiri godine visoko mjesto na skali prioriteta ove Vlade. Započeta implementacija obrazovne reforme postavljat će nove izazove pred obrazovnu zajednicu na koju obrazovne vlasti u Kantonu Sarajevo moraju prikladno odgovoriti. To će se prevashodno realizirati kroz stalnu stručnu podršku nastavnicima implementatorima reforme, dodatno finansiranje projekata rekonstrukcije i nabavke opreme i materijala.

Obrazovna reforma ciljeve postavlja šire od tradicionalne fokusiranosti u učenička postignućai poziva na proširenje perspektive tako da sve više obuhvata pitanja dobrobiti učenika, njihove sreće i zadovoljstva ukupnim školskim doživljajem. Svjesni smo da moramo uložiti dodatne napore da transformišemo školski ambijent i osiguramo najbolje, motivirajuće uvjete za rast i razvoj svakog učenika i učenice, posebno se osvrćući na učenike i učenice iz ranjivih kategorija i gradeći široku mrežu podrške kroz inkluzivne prakse.



Nastavit ćemo ulagati napore da zadržimo leadersku poziciju kada je u pitanju obuhvat djece predškolskim odgojem i obrazovanjem ne samo proširenjem broja javnih i privatnih predškolskih ustanova, već i nastavkom subvencioniranja odlaska djece u vrtić kao jedne od najpopularnijih mjera iz prethodnog mandata. Postepeno ćemo uvoditi koncept dualnog obrazovanja nudeći tako što realističniji doživljaj tržišta rada i prilike za zapošljivost i učenje u realnom okruženju našim učenicima i učenicama.

Ministarstvo kulture i sporta

Sarajevo mora biti kulturni centar regije. Kulturi ćemo vratiti status koji zaslužuje, a kulturnim radnicima i kulturnoj industriji obezbijediti centralno mjesto u našem društvu. Osim izgradnje muzeja Ars Aevi, napokon ćemo završiti zgradu Akademije scenskih umjetnosti, koja je stajala u mjestu do prije par godina.

Nastavit ćemo približavanje kulture građanima i građankama kroz projekt Kultura na ulice. Igrat će se predstave i svirati koncerti na ulicama našeg grada, a naša Filharmonija će na svoj 100. rođendan po prvi put u historiji imati puni sastav muzičara, što je predviđeno već Budžetom za ovu godinu.

Potaknut ćemo poduzetnike da organizuju koncerte, festivale i da mladi svaki vikend mogu izabrati koncert na koji će ići, a ne da planiraju odlazak u druge gradove kako bi zadovoljili osnovnu potrebu za kulturnim sadržajem. Jazz fest se nakon pauze prošle godine vratio nikad bolji, a pobrinut ćemo se da pružimo potporu njegovom daljem razvoju. Investirat ćemo u audio opremu, prvo u Narodno pozorište, Sarajevski ratni teatar, Bosanski kulturni centar, a onda i u Dom mladih Skenderija, kako bosanskohercegovački i regionalni izvođači ne bi svirali po podrumima, već tamo gdje i pripadaju, u dobro opremljenim koncertnim prostorima.

Kulturni sektor je i industrija. Svaka budžetska marka uložena u nezavisnu kulturu vraća četiri marke kroz ekonomsku aktivnost. Ovo je činjenica zbog koje gradovi i države potiču nezavisnu kulturnu djelatnost. Nastavit ćemo s poticajima za audio-vizuelno stvaralaštvo, kako bi se u Sarajevu snimale serije i filmovi, kao i s poticajima za kreativne filmske projekte. U Sarajevu mora ne samo da se svira, već i da se snima.

Podržat ćemo i nezavisne kulturne projekte, poput novog Muzeja islamske kulture i umjetnosti u Sarajevu, Ex-YU rok centra, festivale elektronske i druge muzike, galerije, pojedinačne događaje i, naravno, naš Sarajevo Film Festival. Još jednom ponavljam, kulturna i kreativna industrija je nešto što proizvodi ekonomsku aktivnost, ali je to i industrija koja će vratiti Sarajevu mjesto koje mu pripada, a to je centralno mjesto u regiji.

Sport u Sarajevu je i dalje u vrhu interesovanja, ali, nažalost, danas imamo samo sjećanja na velike rezultate iz prošlosti. Vlada Kantona će učiniti sve da pruži podršku sarajevskom profesionalnom sportu kako bi se vratili na stare staze slave. Kriza sporta u Kantonu Sarajevo nije odlika samo na profesionalnom, već i na rekreativnom nivou. S tim u vezi cilj nam je da naredni period iskoristimo u ulaganje u programe i infrastrukturu rekreativnog sporta.



Ministarstvo za nauku, visoko obrazovanje i mlade

Visoko obrazovanje ima poseban značaj za razvoj i transformaciju društva. Kao što sam pomenuo kulturnu i kreativnu industriju u smislu četverostrukog povrata ulaganja kroz ekonomsku aktivnost, na isti način se društvu oduži svako ulaganje u naučno-istraživačku djelatnost. Potrebno je stalno uvećavati iznos za projekte koji će na našim fakultetima otvarati moderne laboratorije kroz koje ćemo dobiti novu generaciju naučnica i naučnika, te poduzetnica i poduzetnika. Društvo znanja se dobija intenzivnim ulaganjem, a ne postoji mjesto na svijetu gdje se ulaganje u nauku nije višestruko vratilo.

Cilj nam je da se visokoškolske ustanove razvijaju u naučne centre koji će davati smjernice i biti motor napretka našeg društva i privrede.

Razvoj Kampusa ima potencijal da potpuno transformiše pogled građana i građanki na sopstveni grad, a konačna izgradnja će staviti Sarajevo na mapu najljepših univerzitetskih centara Evrope. Dopršetak zgrade Akademije scenskih umjetnosti, izgradnja Univerzitetske biblioteke i adaptacija studentskih domova samo su neki od projekata kojim se želimo približiti zacrtanom cilju.

Ministarstvo finansija

Imajući u vidu da je Izmjenama i dopunama Zakona o pripadnosti javnih prihoda Budžet Kantona Sarajevo za tekuću godinu kažnjen umanjnjem pripadajućih prihoda za 110 miliona KM, akcent će biti prije svega na neutralisanju negativnih posljedica uzrokovanih navedenim Zakonom. Finansijski izazov ćemo ublažiti efikasnijom naplatom ostalih budžetskih prihoda kao i stavljanjem cjelokupne imovine i javnih dobara Kantona Sarajevo u funkciju s ciljem povećanja upotrebne vrijednosti s jedne strane, a s druge strane osiguranjem dodatnih prihoda budžeta.

Ministarstvo će u narednom periodu dovršiti procese uspostave registra finansijskih obaveza i potraživanja, te usvojiti Zakon o registru finansijskih obaveza.

Opredijeljenost Vlade Kantona Sarajevo da poštuje pravosnažne sudske odluke pokazat ćemo, između ostalog, nastavkom dobre prakse prethodne Vlade osiguranjem sredstva za isplatu duga zaposlenicima Kantona po osnovu pravosnažnih sudskih odluka iz radnih odnosa.



Ministarstvo za boračka pitanja

Ovu oblast najprije treba sagledati kroz broj potencijalnih korisnika i korisnica boračko-invalidske zaštite u Kantonu Sarajevo, pri tom imajući u vidu da je na prostoru Kantona Sarajevo preko 80.000 demobiliziranih boraca, 8.192 ratnih vojnih invalida korisnika lične invalidnine, 9.056 porodica šehida i poginulih boraca korisnika porodične invalidnine, te 781 nosilac najvišeg ratnog priznanja i odlikovanja zajedno s učesnicima narodno-oslobodilačkog rata. Ako na ove brojke dodamo i članove porodičnog domaćinstva, supruge i djecu, obuhvat korisnica i korisnika ove zaštite je daleko širi nego što je naprijed navedeno.

Ministarstvo za boračka pitanja kroz realizaciju Programa rada u prvom redu kao zadatak ima ostvarivanje prava utvrđenih Zakonom o dopunskim pravima boraca - branitelja BiH, ukupno 30 prava, te realizaciju važećih skupštinskih odluka, počevši od Odluke o usvajanju projekta Opsada i odbrana 1992 - 1995., Odluke Skupštine Kantona Sarajevo o utvrđivanju Kalendara za obilježavanje značajnih događaja, datuma i ličnosti iz perioda 1992 - 1995. godine, kao i za period 1941 - 1945., Odluke o proglašenju boračkih udruženja, organizacija i saveza od posebnog interesa za Kanton Sarajevo i druge.



3. ZAKLJUČAK

Uvažene zastupnice i zastupnici,

Za kraj, želim da se zahvalim kolegicama i kolegama iz Naroda i pravde, Socijaldemokratske partije Bosne i Hercegovine, Stranke za Bosnu i Hercegovinu i moje matične Naše stranke na povjerenju.

Istovremeno, pozivam kolege i kolegice iz opozicije da radimo zajedno, moja vrata su vam otvorena. Uvjeren sam da svi naši građani i građanke, svi naši birači za Sarajevo žele najbolje: jer znamo da Sarajevo pripada Evropi i da zaslužujemo evropsku kvalitetu života. Zato vam iskreno pružam ruku.

Bez obzira iz koje stranke dolazili, bila ona lijevo, desno ili centralno orijentisana, bili pozicija ili opozicija, uvjeren sam da nam je krajnji cilj da naše sugrađanke i sugrađani žive dostojanstveno, sigurno, u čistom i lijepom gradu, u gradu kojim se ponose.

Budimo partneri u kreiranju kvalitetnijeg života za sve nas.

Hvala!



**PROGRAM SKUPŠTINSKE VEĆINE
U KANTONU SARAJEVO**

2023 – 2026

Sarajevo, 23. mart 2023. godine

Stranke potpisnice ovog programa zalažu se za saradnju zasnovanu na principima i mjerama kojima će u mandatnom periodu 2022 - 2026. unaprijediti kvalitet života građanki i građana Kantona Sarajevo.

Ovaj dokument postavlja okvir saradnje između stranaka potpisnica i prezentira viziju Kantona Sarajevo kao regije građanskih vrijednosti multietničkih temelja, s modernom, efikasnom i transparentnom upravom, uz osnovnu pretpostavku da građani i građanke Kantona Sarajevo zaslužuju sigurno i kvalitetno životno okruženje kao optimalan ambijent za ostvarenje vlastitih potencijala i ambicija.

Ciljevi skupštinske većine u Kantonu Sarajevo su nastavak unapređenja kvaliteta života građana i građanki, kroz podizanje životnog standarda, unapređenje zdravstvenog sistema, podizanje kvalitete komunalnih usluga, energetske održivosti i efikasnosti, zaštitu čovjekove okoline i kvalitete zraka, dalje unapređenje obrazovnog sistema i okruženja za razvoj naučno-istraživačke djelatnosti, unapređenje društvenog statusa mladih, poboljšanje sigurnosne situacije, briga o najranjivijim društvenim grupama i pojedincima, podizanje standarda javnog prevoza, provođenje pronatalitetnih politika, efektivno korištenje fondova EU za razvojne programe, kapitala, iskustva i znanja bosanskohercegovačke dijaspore te stvaranje održivog fiskalnog okvira koji će omogućiti realizaciju aktivnosti pobrojanih u ovom programu skupštinske većine.

Stranke potpisnice čvrsto su usmjerene ka kreiranju političkog ambijenta i kulture upravljanja zasnovanim na temeljima dobre uprave po principima Evropske unije, stručnosti, jednakih šansi i inkluzivnost, te implementacije građanskih prava.

Stranke potpisnice svjesne su da pojedine mjere i projekti zahtijevaju višemandatni angažman, ali su spremne raditi na njima kako bi što prije bile realizirane. Svjesne su i da određene mjere obuhvataju nadležnosti drugih nivoa vlasti, ali su odlučne u namjeri da kao Kanton dogovaraju i iniciraju realizaciju tih mjera prema drugim nivoima vlasti te da pružaju punu saradnju i pomoć drugim nivoima vlasti pri provođenju istih.

Na osnovu pregovora o principima i mjerama zakonodavne vlasti u Kantonu Sarajevo, pregovarački timovi Naroda i Pravde, Socijaldemokratske partije Bosne i Hercegovine, Stranke za Bosnu i Hercegovinu i Naše stranke u Skupštini Kantona Sarajevo saglasno utvrđuju:

PRINCIPI

Zakornitost

Institucije koje čine političku vlast i one kojima su javna ovlaštenja povjerenjena osnivaju se u skladu sa zakonom, a sve odluke i propise koje donose moraju biti u skladu sa važećom legislativom. Unaprijedit ćemo sveobuhvatan sistem kontrole zakonitosti djelovanja javne uprave, jačajući unutarnju i skupštinsku kontrolu, te pružajući punu podršku radu i harmonizaciji institucija koje provode borbu protiv kriminala i korupcije.

Etičnost

Javna uprava mora vratiti povjerenje javnosti. Svi koji predstavljaju javnu upravu moraju prije svega biti vjerni odredbama Ustava, zakona i etičkih principa te se ne voditi privatnim, već javnim interesom. Zaposleni u javnoj upravi ne smiju imati finansijske interese koji su u suprotnosti sa savjesnim vršenjem vlastite dužnosti. Svijest o obavezi djelovanja u javnom interesu će promovirati pravičnost i unaprijediti opće dobro.

Transparentnost

Smatramo da je rad javnih institucija djelotvorniji ako je otvoren ka javnosti, ako javnost u njemu učestvuje, te, u krajnjoj liniji, ako vlast odgovara za propuste. Transparentnošću se osigurava donošenje boljih odluka i priskrbljuje veće povjerenje javnosti u institucije. Jedino se na ovaj način osigurava da, kroz uključivanje i angažman građana i građanki, demokratski oblik upravljanja zaživi u punom obimu.

Participativnost

Nastavit ćemo sa unapređivanjem sistema u kojem će informiranje građana biti kontinuirano. Građani, novinari, opozicija i kompletno civilno društvo pravovremeno će biti informirani o svim planovima vlasti, načinu na koji se troši ili investira javni novac, o zapošljavanju u javni sektor i o dinamici provođenja svih javnih projekata i politika. Redovno ćemo organizirati javne rasprave i istraživanja javnog mnijenja, čiji će rezultati imati dvostruku vrijednost: bolju informiranost nosilaca vlasti i bolju uključenost građanstva.

Vladavina prava

Preduvjet za kvalitetnu implementaciju dobrog upravljanja je nepristrasno i dosljedno provođenje zakona. Propisi koje donosi Kanton Sarajevo jednako će obavezivati sva fizička i pravna lica te štiti osnovna prava, uključujući sigurnost osoba, imovine i slobodu vjere i misli. Stvorit ćemo uvjete za efikasno i pravovremeno izvršavanje sudskih presuda.

Odgovornost, efikasnost i mjerljivost rada

Pristup analiziranju, definiranju i rješavanju izazova mora biti odgovoran i efikasan, a rezultati moraju biti mjerljivi. Samo takvim pristupom se može jasno razgraničiti politika napretka i prosperiteta od politikanstva i populizma. Metoda upravljanja institucijama sistema će biti odgovorna i efikasna s mjerljivim rezultatima svih pojedinaca koji su uključeni u proces izvršavanja vlasti u Kantonu Sarajevo. To je jedan od baznih principa oko kojeg se okupila parlamentarna većina u Kantonu Sarajevo. Precizne i provodive mjere oko kojih se usaglasila parlamentarna većina u Kantonu Sarajevo bit će predmet konstantne evaluacije. Ovaj način upravljanja procesima u Kantonu Sarajevo uključuje građanke i građane, privredu, radnike, medije, nevladin sektor, akademsku zajednicu i mnoge druge, te svakako opoziciju kao korektivni faktor.

Programsko djelovanje

Smatramo da politički subjekti imaju obavezu u program skupštinske većine integrirati svoje politike. Kreiranje vlasti ne smije biti motivirano “zauzimanjem” pozicija, prisvajanjem kontrole dijela budžeta ili, još gore, pravom na zapošljavanje, već mogućnošću da se provode vlastiti politički programi. Svi učesnici u formiranju skupštinske većine potpisuju usaglašen dokument u kojem će biti navedeni osnovni principi djelovanja, najavljeno donošenje zakona i podzakonskih akata te realizacija mjera i inicijativa. Ovaj dokument, u svom punom obliku, bit će dostupan javnosti.

Stručnost, kompetentnost i depolitizacija

Za dosljedno poštivanje principa i realizaciju definiranih mjera pored opredjeljenja potrebno je na najodgovornije pozicije u Kantonu Sarajevo delegirati stručne i kompetentne kadrove. Meritokratijom se mora suzbijati partokratija, koja je jedna od pošasti posttranzicijske Bosne i Hercegovine. Povjerenje koje su građani poklonili parlamentarnoj većini u Kantonu Sarajevo se mora opravdati vidljivim napretkom u svim sferama. To su uglavnom kompleksni problemi, koji se neće riješiti bez punog angažmana kompetentnih i stručnih kadrova. Članstvo u političkoj stranci ne smije biti preferencija iznad stručnosti, kompetentnosti, sposobnosti i ličnog integriteta, ali ni članstvo u političkoj stranci ne treba biti ni prepreka. Potrebno je ohrabriti one najbolje među nama da se u punom kapacitetu angažiraju u rješavanju svih izazova s kojima se susreće Kanton Sarajevo. Ovakav pristup će u konačnici dovesti do depolitizacije javne uprave što je nedvosmisleno jedan od najvećih prioriteta parlamentarne većine u Kantonu Sarajevo.

Predanost političkom dijalogu i konsenzusu

Koaliciono djelovanje političkih opcija različite ideološke pozadine izuzetno je izazovno. Težit ćemo stvaranju konsenzusa i prioritizirati mjere oko kojih postignemo saglasnost. Smatramo da je konsenzus važan, jer svim partnerima daje mogućnost učešća u raspravi te ih ohrabruje na saradnju i razumijevanje drugog i drugačijeg. Politički dijalog neće se zadržati u okviru koalicije, već ćemo ga prakticirati i s predstavnicima opozicije, jer smatramo da ideje dobrim čini njihov sadržaj, a ne ime predlagača.

Održivost

Razvoj Kantona Sarajevo mora zadovoljiti potrebe sadašnje generacije stanovništva bez ugrožavanja razvoja i napretka budućih generacija. Ekonomski rast i društveni napredak ne smiju ugrožavati zrak, zemljište, vodu, biljni i životinjski svijet koji nas okružuju.

Posvećenost društvenom dijalogu

Iskrenim i predanim dijalogom sa socijalnim partnerima ćemo omogućiti aktivan doprinos procesu ujednačavanja socijalne politike, politike zapošljavanja i politike privrednog razvoja Kantona Sarajevo, zasnovanih na poštivanju radničkih prava i omogućavanju djelovanja slobodnog tržišta.

Solidarnost i socijalna pravda

Predano ćemo raditi na iskorjenjivanju siromaštva i socijalne isključenosti, povećanju zaposlenosti i osiguranju dostojanstva rada, jednakih mogućnosti, pristupa blagostanju i pravdi za sve građanke i građane Kantona Sarajevo. Konkretnim mjerama dokazat ćemo našu spremnost da kroz adekvatno planiranje javnih resursa pomognemo onima koji su najugroženiji i unaprijedimo društveni položaj manjinskih grupa.

Strateško finansiranje

Finansiranje i sufinansiranje projekata, pojedinaca, udruženja, privrednih subjekata i manifestacija provodit će se isključivo na konkursnom i projektnom osnovu, a po unaprijed utvrđenim kriterijima usklađenim s ciljevima iz aktuelne Strategije razvoja Kantona Sarajevo.

Predanost borbi protiv zaborava

Nastavit ćemo obilježavati i njegovati kulturu sjećanja na otpor koji su bosanskohercegovačke patriote pružile tokom narodnooslobodilačke borbe '41-'45 i agresije na Bosnu i Hercegovinu '92-'95. S ponosom ćemo se sjećati onih koji su svojim životima odbranili ideal antifašizma, ali i spasili mnoge druge živote od okupatora i agresora.

Opredijeljenost kreiranju društva znanja

Budućnost i opstanak mladih i svih građana u Kantonu Sarajevo ovisi o stalnom unapređenju obrazovnog sistema i jačanju akademskih kapaciteta za naučnoistraživačku djelatnost. Skupština Kantona Sarajevo je kroz obavezujuće zaključke tematske sjednice o unapređenju stanja obrazovanja jasno zauzela stav da je reforma obrazovnog sistema kontinuirani proces i najbitniji generacijski projekt koji nema alternativu. Stoga ostajemo na zauzetom kursu razvoja modernog sistema za prenošenje i kreiranje znanja.

MJERE

Ministarstvo pravde i uprave

- Izrada Zakona o digitalnoj transformaciji Kantona Sarajevo i kreiranje drugih pravnih pretpostavki za digitalizaciju i digitalnu transformaciju javnog sektora u Kantonu Sarajevo;
- Utvrđivanje amandmana na Ustav Kantona Sarajevo u cilju donošenja Zakona o lokalnoj samoupravi Kantona Sarajevo;
- Transformacija Kantona Sarajevo u grad-kanton po uzoru na brojne evropske prijestolnice;
- Jačanje kapaciteta redovnih sudova u Kantonu Sarajevo s ciljem rješavanja nagomilanih sudskih pitanja;
- Jačanje kontrolnih mehanizama u provođenju Uredbe o postupku objavljivanja propisa i javnosti rada s ciljem jačanja kapaciteta javnog sektora i osiguranja transparentnosti u poslovanju;
- Unapređenje sistema edukacija i ocjenjivanja zaposlenih u javnom sektoru;
- Revidiranje normative kojom se uređuje programiranje i izvještavanje u javnom sektoru, u cilju osiguranja funkcionalnog i efikasnog upravljanja kadrovima;
- Uvođenje grantova za produkciju obrazovnog i naučnog programa TVSA.

Ministarstvo zdravstva

- Finansiranje i cjelovita primjena osnovnog paketa zdravstvenih prava za neosigurana lica shodno Zakonu o zdravstvenom osiguranju FBiH i Odluci o utvrđivanju osnovnog paketa zdravstvenih prava;
- Osigurati uvjete da Zavod zdravstvenog osiguranja KS, počne s pravičnom i transparentnom raspodjelom javnih sredstava, a u skladu s planiranim i stvarno pruženim uslugama;
- Potpuna informatizacija ustanova javnog i privatnog zdravstvenog sistema i njihovo puno uvezivanje u jedinstveni informacijski sistem Zavoda zdravstvenog osiguranja;
- Normativno uređenje rada i poslovanja javnih zdravstvenih ustanova i Zavoda zdravstvenog osiguranja kroz donošenje novih, kao i izmjenu i dopunu postojećih podzakonskih akata;

- Usklađivanje broja timova porodične medicine s potrebama stanovništva, a u saradnji s jedinicama lokalne samouprave uz uključivanje lokalne zajednice u sufinansiranje primarne zdravstvene zaštite;
- Obezbjeđivanje nedostajućeg zdravstvenog kadra prema iskazanim potrebama na osnovu stvarnih analitičkih pokazatelja, te primjena Zakona o javno-privatnom partnerstvu zdravstvenog sektora, ondje gdje postoji opravdana potreba;
- Nastavak provođenja screening programa za rano otkrivanje malignoma (2023. godine planirani screening za rano otkrivanje karcinoma dojke, grlića maternice, prostate i melanoma);
- Nastavak nabavke bioničkih proteza, odijela za oboljele paralitičke neuromuskularne bolesti, te nastavak kontinuiranih kapitalnih ulaganja u potrebnu opremu i renoviranje javnih zdravstvenih ustanova;
- Obezbjeđenje finansiranja deficitarnih specijalizacija za javne zdravstvene ustanove;
- Početak rada prvog hospisa za terminalno oboljele osobe.

Ministarstvo komunalne privrede, infrastrukture, prostornog uređenja, građenja i zaštite okoliša

- Dovršetak izrade Urbanističkog plana Grada Sarajeva i sinhronizacija s Prostornim planom Kantona Sarajevo,
- Izmjene i dopune Zakona o prostornom uređenju Kantona Sarajevo, i unapređenje mehanizama za izvršenje mjera inspekcijskih organa u oblasti građenja u cilju sprečavanja nove nelegalne gradnje;
- Donošenje propisa o minimalnoj kvaliteti goriva za zagrijavanje domaćinstava i privrednih subjekata. Kanton Sarajevo treba da prati primjere drugih gradova koji su već započeli proces reguliranja minimalnih standarda o kvaliteti goriva za zagrijavanje. Ova mjera ima za cilj smanjenje emisija štetnih gasova koji značajno doprinose zagađenju zraka i negativno utječu na zdravlje stanovništva;
- Podrška prelasku na ekološke načine zagrijavanja. Ova podrška može uključivati subvencije, kredite s niskim kamatama ili poreske olakšice za ugradnju i korištenje obnovljivih izvora energije;
- Novi tarifni sistem gasne mreže u saradnji s višim nivoima vlasti, s ciljem pojeftinjenja usluga za privredne subjekte;
- Nastavak ulaganja u utopljanje zgrada kako bi se smanjila potrošnja energije i poboljšao kvalitet stanovanja, što uključuje donošenje uredbi kojim će se regulirati naplata toplotne energije prema stvarnoj potrošnji, a što će utjecati na energetska efikasnost i smanjenje potrošnje;
- Izmjene i dopune Zakona o upravljanju zajedničkim dijelovima zgrade;
- Rješavanje problema gradske deponije, a što uključuje i dislokaciju prečistača otpadnih voda;
- Realizacija projekta izgradnje stanova i subvencija za stambeno zbrinjavanje mladih;
- Zamijeniti sva rasvjetna tijela s LED (visokoštednim) sijalicama u Kantonu Sarajevo, gdje bi se na nivou godine značajno uštedilo na potrošnji električne energije;

Ministarstvo saobraćaja

- Infrastruktura javnog prevoza - nabavka novih vozila za javni prevoz, s posebnim fokusom na nabavku tramvaja, trolejbusa i autobusa; rekonstrukcija tramvajske pruge Ilidža - Marijin Dvor i izgradnja nove tramvajske pruge do Hrasnice; rekonstrukcija trolejbuske mreže do Vogošće; izgradnja trolejbuskog i rekonstrukcija tramvajskog depoa; izgradnja novih i rekonstrukcija postojećih tramvajskih stajališta dužinom cijele tramvajske pruge; nabavka opreme za održavanje infrastrukture i vozila javnog prevoza putnika;
- Cestovna infrastruktura - rekonstrukcija, izgradnja i rehabilitacija saobraćajnica u svim općinama Kantona Sarajevo; kapitalni projekti izgradnje I i IX transverzale, spoja IX transverzale sa autoputem i Južne longitudinalne;
- Unapređenje preduzeća za javni prevoz - osnivanje javnog preduzeća za javni prevoz i/ili restrukturiranje postojećeg preduzeća za javni prevoz; formiranje Direkcije za javni prevoz, koja će biti nosilac svih procesa u javnom prevozu;
- Sigurnost u saobraćaju - izrada i usvajanje zakonskih i podzakonskih akata s fokusom na povećanje sigurnosti saobraćaja i kvalitete transportnog sistema; razvoj i unapređenje projekata vezanih za sigurnost u saobraćaju i za sigurnost putnika u javnom prevozu; u zonama osnovnih škola u saradnji sa svim općinama povećanje sigurnosti kretanja učenika postavljanjem saobraćajne opreme za smirivanje saobraćaja; poboljšanje vertikalne i horizontalne saobraćajne signalizacije s posebnim osvrtom na sigurnost kretanja ranjivih kategorija učesnika u saobraćaju;
- Digitalizacija - jedinstveni elektronski sistem naplate karata u svim operaterima javnog prevoza u Kantonu Sarajevo; digitalizacija javnog prevoza kroz softverska rješenja radi olakšanog pristupa putnika svim informacijama o javnom prevozu;
- Kvalitet usluge javnog prevoza - sveobuhvatna analiza i modifikacija kompletne mreže linija i redova vožnje javnog prevoza na području Kantona Sarajevo s ciljem proširenja i poboljšanja usluge te povećanja kvaliteta javnog prevoza; strateško definiranje i pozicioniranje terminala javnog prevoza u Kantonu Sarajevo (proširenje postojećih i izgradnja novih) koji će omogućiti kvalitetniju uslugu putnicima; unapređenje infrastrukture željezničkih stajališta u saradnji sa JP Željeznice FBiH, radi sigurnijeg i kvalitetnijeg pristupa putnicima; planiranje savremenog terminala i uvezivanje svih vrsta javnog prevoza na jednom mjestu;
- Adaptivno upravljanje saobraćajem - uspostava sistema adaptivnog upravljanja saobraćajem na svim semaforiziranim raskrsnicama na području Kantona Sarajevo, uz izgradnju savremenog centra za upravljanje i nadzor nad saobraćajem;
- Zaštita okoliša kroz saobraćaj - provođenje definiranih mjera iz Plana urbane mobilnosti Kantona Sarajevo (SUMP) s posebnim fokusom na smanjenje zagađenja zraka te povećanje učinkovitosti i mobilnosti; razvijanje elektromobilnosti, postavljanje električnih punionica, uvođenje car sharing usluge; proširenje biciklističkih staza;
- Saobraćaj u mirovanju - Proširenje parking mjesta u svim općinama Kantona Sarajevo; izgradnja potrebne infrastrukture i uspostava „park & ride“ sistema na obodima grada uz adekvatno povezivanje s javnim gradskim saobraćajem; izgradnja parkinga za turističke autobuse, te „pick up“ i „drop off“ mjesta za turističke autobuse i turiste;
- Novo preduzeće za ceste - Transformacija Direkcije za puteve u javno preduzeće

Ministarstvo za rad, socijalnu politiku, raseljena lica i izbjeglice

- Donošenje novog Zakona o socijalnoj zaštiti Kantona Sarajevo; donošenje Zakona o socijalnom poduzetništvu i Zakona o Ekonomsko-socijalnom vijeću s ciljem uključivanja sindikata i poslodavaca i poslodavki u donošenje svih značajnijih odluka u Kantonu Sarajevo; izmjene Zakona o platama i naknadama u ustanovama socijalne zaštite (usklađivanje);
- Jačanje kapaciteta (ljudskih i materijalnih) Centara za socijalni rad KS;
- Ostvarivanje bolje saradnje između ustanova socijalne zaštite i shvatanje uloge Organa starateljstva u zbrinjavanju korisnika;
- Nastavak transformacije i deinstitucionalizacije ustanova socijalne zaštite (KJU Dječiji dom Bjelave, KJU Dom Nahorevo, KJU Gerontološki centar -Uspostavljanje adekvatne prihvatne stanice za beskućnike, proširenje korisnika i jačanje smještajnih kapaciteta JU Kampus Kantona Sarajevo (odjel za djecu i žene) i poboljšanje uvjeta prijema i smještaja korisnika; uklanjanje arhitektonskih barijera u svim ustanovama i institucijama Kantona Sarajevo;
- Revizija i unapređenje uvjeta za osnivanje ustanova socijalne zaštite i novih usluga (razvoj usluga pomoć u kući i dr.)
- Donošenje novih programa sufinansiranja zapošljavanja i samozapošljavanja djece bez roditeljskog staranja i žrtava nasilja u porodici;
- Određivanje i redefiniranje cijena socijalnih usluga i povećanje socijalnih naknada u KS;
- Nastavak rada Vijeća za reformu tržišta rada za područje KS; finalizacija reforme rada Službe za zapošljavanje, na osnovu predloženih reformi;
- Ušteda budžetskih sredstava rješavanjem imovinsko-pravnih pitanja zgrade za socijalno stanovanje na Otesu - revizija korisnika zgrade za socijalno stanovanje u Otesu; nove prostorije za Službu socijalne zaštite Novo Sarajevo u saradnji s Općinom Novo Sarajevo, kao i rješavanje zgrade Doma za socijalno zdravstveno zbrinjavanje osoba s invaliditetom i drugih osoba.
- Programi pomoći održivom povratku u i van Kantona Sarajevo;
- Promocija ravnopravnosti spolova i unapređenje položaja žena.

Ministarstvo unutrašnjih poslova

- Redovno, a najmanje jedanput godišnje, na načelima transparentnosti i objektivnosti, uz poštovanje principa fer i poštene procedure, provoditi javni konkurs za prijem policijskih službenika u činu policajac i mlađi inspektor;
- Implementacija Zakona o policijskim službenicima Kantona Sarajevo u smislu uvođenja i jačanja struke (vrste i stepena stručne spreme) kojima će se omogućiti prijem policijskih službenika stručno osposobljenih iz oblasti koje su usko povezane s obavljanjem policijskih zadataka;
- Nastaviti sa stalnim jačanjem operativnih kapaciteta kroz ulaganje u materijalno-tehničko opremanje policije;

- Vršiti analizu implementacije Zakona o unutrašnjim poslovima i Zakona o policijskim službenicima Kantona Sarajevo, procjena utjecaja propisa u dijelu funkcije unutrašnje kontrole, integriteta policijskih službenika (body kamere, ostvarenje jačanja integriteta policijskih službenika kroz jačanje antikoruptivnih mjera i ostalo);
- Izvršiti analizu i plan izgradnje poslovnih zgrada MUP-a Kantona Sarajevo u sjedištu PU Centar, PU Novo Sarajevo, PU Ilidža i eventualno drugih zgrada potrebnih za obavljanje policijskih poslova Uprave policije u MUP Kantona Sarajevo;
- Nastaviti sveobuhvatne sistemske aktivnosti na projektu uspostavljanja helikopterske jedinice MUP-a Kantona Sarajevo, te stvaranje neophodnih uvjeta za nabavku i isporuku višenamjenskog helikoptera tokom perioda 2024 - 2025. godina, za operativne poslove MUP-a Kantona Sarajevo, ali i za civilne potrebe - podrška za medicinske intervencije, elementarne nepogode (požari, poplave, zemljotres i sl.), doprema svih vrsta pomoći, kontrola dalekovoda, PTT predajnika i mobilnih uređaja i ostalo;
- Nastaviti s jačanjem forenzičkih kapaciteta MUP-a Kantona Sarajevo u smislu brzog i efikasnog korištenja DNK, daktiloskopskih, balističkih i drugih analiza kao najvažnijeg aspekta u otkrivanju i dokazivanju kriminaliteta;
- Donijeti Zakon o prekršajima protiv javnog reda i mira;
- Donijeti Zakon o nabavljanju, nošenju i držanju oružja Kantona Sarajevo, usklađen s Direktivama EU;
- Donijeti Zakon o plaćama policijskih službenika u Kantonu Sarajevo;
- Izvršiti analizu mogućih izmjena Zakona o javnom okupljanju u Kantonu Sarajevo.

Ministarstvo privrede

- Donošenje Zakona o izmjenama i dopunama Zakona o upravljanju privrednim društvima u nadležnosti Kantona Sarajevo, Zakona o rudarstvu, Zakona o zakupu poslovnih zgrada i prostorija, te donošenje novog Zakona o javno-privatnom partnerstvu, Zakona o novčanim podsticajima u poljoprivredi i ruralnom razvoju na području Kantona Sarajevo, Zakona o ugostiteljskoj djelatnosti, Zakona o poticaju strateških grana privrede na području Kantona Sarajevo, Zakona o turizmu Kantona Sarajevo, Zakona o Turističkoj zajednici Kantona Sarajevo, kao i izrada Strategije razvoja turizma Kantona Sarajevo;
- Uspostavljanje kataloga JPP projekata i realizacija prvog projekta kroz model JPP kao i uspostavljanje kataloga koncesija i realizacija prvog Javnog poziva za dodjelu koncesije;
- Uspostava Centra za razvoj poduzetništva kao organizacione jedinice Javne ustanove "Centar za napredne tehnologije u Sarajevu";
- Povećanje površina obraslih šumskim drvećem kroz nastavak masovnog pošumljavanja na području Kantona Sarajevo;
- Organiziranje sajma domaće poljoprivrede,
- Izgradnja tvornice peleta s kogeneracijskim postrojenjem za proizvodnju električne energije, te nastavak tehnološke modernizacije KJP "Sarajevo - šume" d.o.o. i uvođenje ekološko prihvatljivih tehnologija u gospodarenju šumama
- U saradnji s ministarstvima podržati programe uvezivanja obrazovnih institucija sa strateškim granama industrije, s ciljem obuke i zapošljavanja neophodnih ljudskih resursa;

- Revitalizacija postojećih i izgradnja novih turističkih, sportskih i rekreacijskih sadržaja na Bjelašnici i Igmanu;
- Poboljšanje pasminskog sastava goveda u cilju povećanje proizvodnje mlijeka i mesa, a time i stabilnost poljoprivrednog dohotka kroz aktivnosti na vještačkom osjemenjivanju goveda;
- Rekonstrukcija i sanacija postojećeg azila za pse u Prači, kao i izgradnja novog azila za napuštene pse i mačke na lokalitetu Rakovica - "Terapijska zajednica Kampus";
- Stavljanje u funkciju imovine po Aneksu G Sporazuma o sukcesiji (cca 20.000 m²);
- Osnivanje javnog preduzeća za proizvodnju električne energije iz obnovljivih izvora energije, u slučaju pozitivnog nalaza studije opravdanosti njegovog osnivanja;
- Uspostava kantonalne poslovne zone "Doglodi";
- Kreiranje programa o zelenoj ekonomskoj tranziciji;
- Istraživanje potencijala solarne i geotermalne energije, kao i istraživanje mineralnih sirovina i vjetroenergetskog potencijala;
- Donošenje Strategije upravljanja privrednim društvima s učešćem državnog kapitala KS za period 2023 - 2027. godine te uspostavljanje jedinstvenog registra svih privrednih društava s učešćem državnog kapitala;
- Nastavak i jačanje provođenja kontinuiranih mjera na sprečavanju pojave i širenja zoonoza provođenjem aktivnosti veterinarsko javnog zdravstva odnosno mjera zdravstvene zaštite životinja i mjera na većoj higijensko zdravstvenoj ispravnosti proizvoda životinjskog porijekla na području Kantona Sarajevo;
- Kreiranje inovacijskog fonda;
- Valorizacija i formalno - pravna zaštita prašume Ravna vala i šuma posebne namjene na području Igmana;
- Izgradnja dvije vjetroelektrane na području Kantona Sarajevo

Ministarstvo za odgoj i obrazovanje

- Donošenje Zakona o odgoju i obrazovanju u osnovnoj i srednjoj školi u Kantonu Sarajevo, Zakona o dualnom obrazovanju u Kantonu Sarajevo i Zakona o predškolskom odgoju i obrazovanju u Kantonu Sarajevo;
- Jačanje kapaciteta i resursa Instituta za razvoj preduniverzitetskog obrazovanja;
- Implementacija kurikularne reforme - puna reforma nastavnih planova i programa s fokusom na dijete, te uvođenje specijaliziranih programa u predškolski odgoj i obrazovanje, koji će korištenjem inovativnih metoda obogatiti nastavni plan i program za predškolski odgoj i obrazovanje;
- Razvoj kapaciteta za obavezno predškolsko obrazovanje. Nastavak intenzivnog širenja obuhvata djece u predškolskom obrazovanju kroz širenje kapaciteta JU Djeca Sarajeva i sufinansiranje boravka djece u privatnim predškolskim ustanovama;
- Pokretanje novih programa prekvalifikacije i dokvalifikacije i projekata cjeloživotnog učenja;
- Provođenje zaključaka Tematske sjednice Skupštine Kantona Sarajevo o inkluziji u obrazovanju i Posebnog programa Vlade za interesorno unapređenje inkluzije;

- Razvoj posebnog programa za izvrsnost i liderstvo;
- Unapređenje i standardizovanje oblasti odgoja kroz razvoj posebnih programa u školstvu;
- Uspostava digitalne platforme s nastavnim materijalima i mogućnostima izgradnje profesionalnih zajednica radnika u obrazovanju s ciljem jačanja profesionalnih kapaciteta radnika u obrazovanju;
- Rekonstrukcija školskih prostora, a posebno biblioteka s multifunkcionalnim prostorima za druženje i učenje, prostora aula/holova, sportskih sala, kabineta za predmete egzaktnih nauka, školskih dvorišta, toaleta, školskih restorana, stomatoloških ambulanti; te kontinuirano opremanje škola kompjuterima i didaktičkom opremom.

Ministarstvo za nauku, visoko obrazovanje i mlade

- Rasterećenje nastavnog i saradničkog kadra od administrativnih poslova kako bi se nastavni kadar fokusirao na kvalitet nastave;
- Preciznija sistematizacija grupacija organizacionih jedinica Univerziteta u Sarajevu (fakulteta) prema njihovim specifičnostima;
- Reforma visokog obrazovanja u smislu ukрупnjivanja usitnjenih nastavnih predmeta (kurikuluma) po uzoru na uspješne primjere iz EU;
- Uvođenje obavezne praktične nastave za sve studije, te kreiranje programa podsticaja privrednim društvima i ustanovama koje omogućavaju praktičnu nastavu;
- Usklađivanje i racionalizacija upisne politike prema potrebama društva, te usaglašavanje standarda nastave i ostalih standarda javnih i privatnih univerziteta;
- Formiranje univerzitetskih liga za kolektivne i individualne sportove, te u okviru kampusa predvidjeti otvorene i zatvorene terene za sportove i rekreaciju studenata (atletska i ledena zatvorena dvorana);
- Izgradnja Kampusa Univerziteta u Sarajevu kao modernog studentskog centra, te proširenje postojećih kapaciteta i izgradnja novih smještajnih kapaciteta, s akcentom na adekvatnom standardu, koji u svom sastavu trebaju imati i prostore za rekreaciju;
- Poticanje kulturnih i umjetničkih aktivnosti mladih, kao i olakšice za preduzeća i institucije koje potiču i podržavaju ove aktivnost;
- Proširenje materijalnih, tehničkih i ljudskih kapaciteta visokoškolskih ustanova kroz osiguranje adekvatnih istraživačkih kapaciteta, kako bi visokoškolske ustanove postale naučni centri;
- Saradnja s Gradom Sarajevom na rekonstrukciji Astronomske opservatorije na Trebeviću i otvaranje Katedre za astrofiziku i astronomiju na Prirodno-matematičkom fakultetu Univerziteta u Sarajevu;

Ministarstvo kulture i sporta

- Donošenje Strategije razvoja kulture i sporta Kantona Sarajevo 2023 - 2027 i zakona o kulturi i sportu u Kantonu Sarajevo,
- Saniranje poreznih dugovanja sportskih klubova nastalih do 2020. god kroz javni poziv MKS KS,
- Revidiranje uspješnosti rada javnih ustanova kulture s ciljem optimizacije finansiranja i realizacije namijenjene kulturne funkcije kao i revidiranje liste i obaveza istaknutih samostalnih umjetnika i umjetnica;
- Budžet za sport 1% od ukupnog prihoda Budžeta Kantona Sarajevo;
- Provođenje programa finansiranja sportista i sportistkinja sa vrhunskim sportskim rezultatima kao i mapiranje sportskih i kulturnih manifestacija, infrastrukture i kalendara takmičenja;
- Izgradnja savremene biblioteke kao i unapređenje, modernizacija rada i digitalizacija bibliotečkog fonda "JU Biblioteka Sarajevo";
- Inkluzija djece iz ranjivih kategorija stanovništva u sportske aktivnosti kroz besplatne programe;
- Sufinansiranje izgradnje, obnove i održavanja objekata od interesa za kulturu i sport;
- Donošenje odluke o sportskim klubovima od javnog interesa za Kanton Sarajevo i kreiranje okvira finansiranja klubova od strateškog interesa;
- Realizacija projekta rekonstrukcije i sanacija stare željezničke stanice Ilidža u saradnji sa lokalnom zajednicom.

Ministarstvo finansija

- Poduzeti sve neophodne aktivnosti koje će dovesti do efikasnije naplate svih ostalih budžetskih prihoda, u cilju umanjena negativnih posljedica primjene novih pondera za raspodjelu PDV-a za kantonalni nivo u Federaciji Bosne i Hercegovine;
- Stavljanje cjelokupne javne imovine i javnih dobara u Kantonu Sarajevo u funkciju, čiji će cilj biti osim njihove bazne vrijednosti i povećanje prihoda u budžetu Kantona Sarajevo (javne površine, javni parkinzi, poljoprivredno zemljište, građevinsko zemljište, zgrade, šumsko zemljište i koncesije i ostala dobra);
- Preispitivanje svih zakonskih rješenja kojima se uređuje oblast budžetskih prihoda u Kantonu Sarajevo s ciljem uspostavljanja pravednijeg, ravnomjernijeg i efikasnijeg fiskalnog sistema koji će omogućiti i povećanje budžeta Kantona Sarajevo;
- Analiza svih kantonalnih institucija sa stanovišta njihove opravdanosti i finansijske efikasnosti njihovog djelovanja,
- Povećanje kapitalnih izdvajanja iz Budžeta KS;
- Povećanje ukupne ekonomske aktivnosti (stvaranje povoljnijeg okruženja za ulaganje i investiranje), koja će u konačnici omogućiti povećanje prihoda u budžetu koji se odnose na porez na dobit, porez na dohodak itd.

- Poduzeti sve neophodne aktivnosti koje će osigurati dovoljan iznos novčanih sredstava u budžetu Kantona Sarajevo na odgovarajućoj poziciji, a koja će omogućiti naplatu svih potraživanja koja su dosuđena po osnovu pravosnažnih sudskih odluka iz radnog odnosa, uključujući i zakonske zatezne kamate, svim imaocima pravosnažnih i izvršnih sudskih presuda ili rješenja;
- Uspostava Registra finansijskih potraživanja u Kantonu Sarajevo. Uspostavljanje jedinstvene evidencije potraživanja u Kantonu Sarajevo, poboljšanje metodologije i dinamike naplate potraživanja, definiranje mjera prema dužnicima i dužnicama koji ne izmiruju svoje obaveze prema Kantonu Sarajevo, s krajnjim općim ciljem povećanja budžetskih prihoda.

Ministarstvo za boračka pitanja

- Podrška prekvalifikaciji i profesionalnoj edukaciji braniteljske populacije s ciljem lakšeg zapošljavanja ili održivosti radnog mjesta i priprema godišnjih programa zapošljavanja i održivog zapošljavanja braniteljske populacije u cilju ekonomskog osnaživanja;
- Nastavak procesa stambenog zbrinjavanja (dodjela stana u vlasništvo, dodjela građevinskog materijala, izvođenje građevinskih radova, udruživanje sredstava za kupovinu stambenog objekta) braniteljske populacije i članova/članica njihovih porodica prema jasnijim i transparentnijim kriterijima;
- Investiranje u dalje obrazovanje djece pripadnika braniteljske populacije, jačanjem stipendijskog kapaciteta Fonda Ikre i obezbjeđenje adekvatnih finansijskih sredstava za realizaciju stipendiranja, s posebnim naglaskom na stipendiranje II i III ciklusa bolonjskog studija;
- Interresornom saradnjom s Ministarstvom za rad, socijalnu politiku, raseljena lica i izbjeglice Kantona Sarajevo, te JU „Služba za zapošljavanje Kantona Sarajevo“ provesti posebne programe zapošljavanja maloljetnih branitelja, djece šehida i poginulih branitelja i djece ratnih vojnih invalida.
- Izrada socijalne karte branitelja i braniteljki na području Kantona Sarajevo;
- Stvaranje preduvjeta za subvencioniranje smještaja potrebnih za pripadnike braniteljske populacije u gerontološke centre i pomoć pri osnivanju veteranskog centra;
- Poboljšanje i unapređenje zdravstvene zaštite braniteljske populacije kroz: primarni nivo - otvaranje veteranskih ambulanti pri domovima zdravlja; Sekundarni nivo - otvaranje veteranskog odjela pri Općoj bolnici „Prim.dr. Abdulah Nakaš“; otvaranje dnevne bolnice za oboljele od PTSP-a - Psihijatrijska bolnica Kantona Sarajevo.
- Nastavak aktivnosti na Projektu izgradnje Centralnog spomen obilježja svim poginulim braniteljima opkoljenog Sarajeva;

- Njegovanje kulture sjećanja i kulture pamćenja kroz finaliziranje kapitalnih projekata u saradnji s JU „Fond Memorijala Kantona Sarajevo“ kroz: nastavak aktivnosti realizacije potprojekta izgradnje Memorijalnog kompleksa „Žuč“; revitalizaciju i rekonstrukciju objekta „Kon-Tiki“, te privođenje objekta namjeni u Muzej stradanja građana BiH u skladu s Odlukom „Opsada i odbrana Sarajeva 1992-1995“; nastavak aktivnosti na projektu obilježavanja vatrenih tačaka opsade i odbrane Sarajeva; realizaciju projekta „Muzej opsade i odbrane Sarajeva“; potpuna revitalizacija i sanacija postojećeg Tunela D-B s dobrinjske strane uz odgovarajuće edukativne i muzejske sadržaje.
- Digitalizacija procesa ostvarivanja pojedinih prava i omogućavanje prenosa određenih prava u prvostepenom postupku na općine, u skladu s propisima iz oblasti lokalne samouprave (u saradnji s višim nivoima vlasti);

Narod i Pravda

Socijaldemokratska partija
Bosne i Hercegovine

Stranka za Bosnu i Hercegovinu

Naša stranka